

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U ZENICI  
BROJ: 43 0 K 151843 17 K  
Zenica, 10.01.2018. godine

U IME FEDERACIJE BOSNE I HERCEGOVINE !

Općinski sud u Zenici, sudija Agić Sabrija, kao pojedinac, uz učešće zapisničara Ade Šabanović u krivičnom predmetu protiv optuženog Nezirević Edina, zbog krivičnog djela izazivanje narodnosne, rasne i vjerske mržnje, razdora ili netrpeljivosti iz člana 163. stav 2. u vezi sa stavom 1. KZ FBiH, po optužnici Kantonalnog tužilaštva Zenica broj: T04 0 KT 0031630 17 od 10.10.2017. godine, na pretresu za izricanje krivične sankcije, u prisutnosti Kantonalnog tužioca iz Zenice Tomaš Branislava i optuženog Nezirević Edina, dana 10.01.2018. godine donio je i javno objavio

P R E S U D U

Optuženi Nezirević Edin, sin Z. i S., rođene J., rođen [REDACTED] u Foči, nastanjen u mjestu Topčić polje Kahrimani [REDACTED], Grad Zenica, pismen, sa završenom osnovnom školom, po zanimanju poljoprivrednik, od imovine posjeduje auto, oženjen, supruga nezaposlena, otac troje djece, srednjeg imovnog stanja, Bošnjak, državljanin BiH, JMBG: [REDACTED], osuđivan,

K R I V I J E

Što je,

Dana 06.09.2017. godine, oko 17,40 sati, na području Grada Zenice u mjestu Topčić polje dok je vozio p.m.v. marke „Mazda“ reg. oznaka [REDACTED], prolazeći pored kuće N.A. , a ispred koje kuće su na terasi sjedile osobe srpske nacionalnosti: N.R. , Z.B., Z.G., N.M., V.R., C.B. i dr., zaustavio svoje vozilo, otvorio prozor na istom te se obratio ovim osobama riječima: „Šta se smijete, jebem vam majku srpsku“, nakon čega se vozilom udaljio, da bi se nakon kraćeg vremena pješke vratio do ove kuće, gdje je čučnuo iza jednog drveta, te iza pojasa izvadio plastični pištolj crne boje koji liči na pravi, te ovaj pištolj uperio prema ovim osobama srpske nacionalnosti i tom prilikom im je glasno zaprijetio: „Sve ću vas pobiti, jebem vam majku srpsku“, pa su nakon ove ozbiljne prijetnje ove osobe pobjegle sa terase i sakrili se iza kuće,

Čime je počinio krivično djelo izazivanje narodnosne, rasne i vjerske mržnje, razdora ili netrpeljivosti iz člana 163. stav 2. u vezi sa stavom 1. KZ FBiH, pa se na osnovu istog člana i propisa, i uz primjenu odredbi čl.62. KZFBiH, a u vezi sporazuma o priznanju krivnje od 01.12.2017. godine izriče se:

U V J E T N A O S U D A

Utvrđuje se kazna zatvora u trajanju od 1 (jedne) godine, a koja se neće izvršiti ako optuženi Nezirević Edin u roku od 2 (dvije) godine od dana pravomoćnosti Presude ne učini novo krivično djelo.

U skladu sa članom 202.stav 4. ZKP-a F BiH optuženi Nezirević Edin se oslobađa obaveze da Sudu naknadi troškove krivičnog postupka.

U skladu sa članom 78. stav 1. KZ F BiH optuženom Nezirević Edinu izriče se mjera sigurnosti oduzimanja jednog plastičnog pištolja crne boje, te se nalaže PU I Zenica da isti uništi odmah nakon pravomoćnosti Presude.

O b r a z l o ž e n j e

Kantonalno tužilaštvo Zenica je kod ovog Suda dana 11.10.2017. godine podiglo optužnicu, broj: T04 0 KT 0031630 17 od 10.10.2017. godine, a koja je potvrđena 12.10.2017. protiv optuženog Nezirević Edina, zbog krivičnog djela izazivanje narodnosne, rasne i vjerske mržnje, razdora ili netrpeljivosti iz člana 163. stav 2. u vezi sa stavom 1. KZ FBiH, bliže opisano u dispozitivu Presude.

Na zapisnik o izjašnjenju o krivnji od 12.11.2017. godine optuženi Nezirević Edin se izjasnio da nije kriv za predmetno krivično djelo.

Tužilaštvo je sa optuženim Nezirević Edinom zaključilo i u spis Suda uložilo Sporazum o priznanju krivnje prije otvaranja glavnog pretresa.

Prema Sporazumu o priznanju krivnje Tužilaštvo je dogovorilo da optuženi Nezirević Edin priznaje krivnju za počinjeno krivično djelo zbog krivičnog djela izazivanje narodnosne, rasne i vjerske mržnje, razdora ili netrpeljivosti iz člana 163. stav 2. u vezi sa stavom 1. KZ FBiH i da mu se za isto izrekne kazna zatvora u trajanju od 1 (jedne) godine, a koja se neće izvršiti ako optuženi Nezirević Edin u roku od 2 (dvije) godine od dana pravomoćnosti Presude ne učini novo krivično djelo. Nakon razmatranja Sporazuma o priznanju krivnje, te saslušanja Optuženog o navedenom sporazumu, Sud je utvrdio da je Optuženi izjavu o priznanju krivnje dao dobrovoljno, svjesno i sa razumijevanjem, da je razumio da se Sporazumom o priznanju krivnje odriče prava na suđenje, da ne može uložiti žalbu na krivičnopravnu sankciju koja će im biti izrečena, kao i da je upoznat sa svim posljedicama zaključenja sporazuma uključujući i posljedice vezane za naknadu štete Oštećenim i naknadu troškova krivičnog postupka.

Nakon toga Sud je izvršio uvid u dokaze na kojima se zasniva Optužba i to: zapisnik o saslušanju svjedoka N.A. od 07.09.2017. godine, zapisnik o saslušanju svjedoka N.R. od 07.09.2017. godine, zapisnik o saslušanju svjedoka Z.G. od 07.09.2017. godine, zapisnik o saslušanju svjedoka Z.B. od 07.09.2017. godine, zapisnik o saslušanju svjedoka M.Ž. od 25.09.2017. godine, zapisnik o saslušanju svjedoka Z.B. od 25.09.2017. godine, zapisnik o saslušanju svjedoka N.M. od 07.09.2017. godine, Ugovor o nabavci isporuci i montaži opreme broj 24/17 od 08.07.2017. godine, Naredba Općinskog suda u Zenici broj: 43 0 K 150540 17 Kpp od 07.09.2017. godine, Zapisnik o pretresanju kuće, dvorišta kuće i pomoćnih objekata PU I Zenica broj: 08-04/9-4-71/17 od 07.09.2017. godine, Zapisnik o pretresanju pmv PU I Zenica broj: 08-04/9-4-72/17 od 07.09.2017. godine, Potvrda o privremenom oduzimanju predmeta PU I Zenica broj: 08-04/9-4-203/17 od 07.09.2017. godine, Odobrenje za otvaranje i pregled privremeno oduzetih predmeta Tužiteljstva ZDK broj: T04 0 KTA 0031630 17 od 12.09.2017. godine, Zapisnik o otvaranju i pregledu privremeno oduzetih predmeta i dokumentacije UP Zenica broj 08-04/9-4-535/17 od 19.09.2017. godine, Fotodokumentacija sa pretresa kuće i pomoćnih objekata broj: 08-04/9-4-523/17 od 05.10.2017.godine i Izvod iz kaznene evidencije sa optuženog Nezirević Edina. Optuženi nije prigovorio sadržaju i zakonitosti dokaza.

Na osnovu Sporazuma o priznanju krivnje, izjave Optuženog i svih dokaza u spisu, Sud je na nesumnjiv način utvrdio da je optuženi Nezirević Edin počinio krivično djelo izazivanje narodnosne, rasne i vjerske mržnje, razdora ili netrpeljivosti iz člana 163. stav 2. u vezi sa stavom 1. KZ FBiH, na način kako je to bliže opisano u dispozitivu Presude i da je kriv za isto.

Cijeneći krivičnopravnu sankciju predloženu Sporazumom o priznanju krivnje, Sud je našao da je ista adekvatna počinjenom krivičnom djelu i ličnosti Optuženog i Sud očekuje da će se sa izrečenom uvjetnom osudom ostvariti opća i individualna svrha izricanja krivičnih sankcija.

Odluka o troškovima postupka, koji se odnose na paušal u iznosu od po 100,00 KM, temelji se na odredbi člana 202. stav 4. ZKP FBiH, a Sud je optuženog Nezirević Edina oslobodio da iste nadoknade, jer se isti nema redovna primanja i obavezivanjem da iste nadoknadi bilo bi dovedeno u pitanje njihovo izdržavanje.

Odluka o izrečenoj mjeri sigurnosti oduzimanja predmetnog plastičnog pištolja crne boje od optuženog Nezirević Edina temelji se na odredbi člana 78. stav 1. KZ-a FBiH kojom je propisano da predmeti koji su upotrijebljeni ili su bili namijenjeni za učinjenje krivičnog djela ili koji su nastali učinjenjem krivičnog djela oduzet će se, kad postoji opasnost da će biti ponovo upotrijebljeni za učinjenje krivičnog djela ili kad se radi zaštite opće sigurnosti ili iz razloga morala lišenje čini prijeko potrebnim, ako su vlasništvo učinitelja.

Shodno iznešenom valjalo je Sudu odlučiti kao u dispozitivu Presude.

Zapisničar  
Ada Šabanović

Sudija  
Sabrija Agić

#### PRAVNA POUKA:

Protiv ove Presude može se izjaviti žalba Kantonalnom sudu u Zenici u roku od 15 dana od dana prijema pismenog otpravka Presude, a žalba se podnosi putem ovog Suda u četiri primjerka. Stranke mogu izjaviti žalbu iz svih zakonskih razloga, osim u pogledu izrečene krivičnopravne sankcije, a Oštećeni zbog odluke o troškovima postupka i o imovinskopravnom zahtjevu.